

## **Cussegl pastoral – rapport dalla presidenta 2021/2022**

Cun duas premcommunicantas havein festivau dumengi'alva ils 20-06-21. Sur Tomasz ha tratg las buobas en ina barca da baselgia viaden. Cun cant e musica han las buobas Scherrer e Barenius embelliu la fiasta. Suenter la s. messa ha il cussegl pastoral purschiu in aperitiv.

A caschun dalla perdanonza da Zignau dils 27-06-21 ha il cussegl pastoral purschiu in aperitiv.

Ils 16-08-21 havein saviu entscheiver igl onn da scola cun in survetsch divin en baselgia el ravugl dallas scolaras e dils scolars cun personas d'instrucziun. Era ils geniturs dils affons che han entschiet la scola ni la scoletta ein stai envidai.

In di da bial'aura, ils 1-09-21 havein lavau ora la baselgia da Nossadunna dalla Glisch. Rodund otg personas ein stadas presentas.

Da perdanonza si Nossadunna dalla Glisch havein festivau in survetsch divin ils 12-09-21 ed il chor cecilian ha cantau. Suenter messa ha ei dau ina pintga processiuon entuorn baselgia – cun benedicziun ed ina canzun dil chor.

Tier la perdanonza da Trun, da dumengia dil rusari dils 3-10-21, nua che las mattas han purtau la statua da Nossadunna, ha il cussegl pastoral era puspei saviu porscher in aperitiv.

Nossa pleiv ha in grond diember da ministrants e ministrantas. Quei secapescha bu da sesez. En quei liug lessel engraziar alla calustra Gabi per siu engaschi cun nos ministrants. A Trun dumbran ils ministrants e ministrantas 25 ed ina ministranta a Schlans. Ils 7-10-2021 havein organisau in di special per ministrants e ministrantas. Tier tschun differents posts han ils affons saviu emprender d'enconuscher empau nossa baselgia da s. Martin. Cun sur Tomasz han ei survegniu ina investa sur digl entscheins. Tier la calustra Gabi ina refrestgentada dil survir messa. Cun Georg han ei astgau ir sil clutger baselgia e nies organist Clau ha mussau als affons l'orgla. Suenter quellas impressiuns ein tuts serendi ell'ustria dil Centro e saviu guder ina pizza ed in bien glace. Quei ei stau in bi suentermiezdi cun nos gidonters e nossas gidontras dalla sontga messa.

Duront il meins d'october ein las mesiras pertuccont corona vegnidas pli rigurusas. Aschia ha ei duvrau igl agid da nies cussegl pastoral per far quellas controllas da certificat. Quei ei buca adina stau emperneivel, ha duvrau pazienza ed empau pial dira. Engraziel da cor agl entir cussegl per il sustegn e per igl engaschi en quella causa. In special engraziament ad Olivia

per la buna coordinaziun e per sia promptadad dad adina puspei seglir en tier sepulturas ni sch'enzatgi muncava.

Cunquei che sur Tomasz era absents ha il cussegl pastoral preparau per ils 24-10-2021 in survetsch divin dil plaid. Aschia havein saviu porscher allas parochianas ed als parochians la pusseivladat da visitar in survetsch divin.

Il venderdis avon il di da suppa havein gidau la Beni dil Tschut a preparar las verduras e la carn per la suppa. Engraziel fetg alla Beni per far la suppa e per tut siu sustegn. Engraziel era a tut tgi che ha gidau.. Ils 14-11-21, la fiasta da s. Martin, havein lura organisau il di da suppa. Rodund 50 persunas ein serendidas suenter messa en sala da gimnastica per guder ina buna suppa, petta ed era la usitada tombola. Nus havein saviu recaltgar la summa da 1`755.- frs. en favur dalla renovaziun dalla baselgia da Nossadunna dalla Glisch.

Sin damonda da pliras persunas havein uonn purtau miez december la glisch da Bethlehem en nossa beselgia a Trun. La glisch ei stada tochen suenter Nadal en baselgia. La pleiv ha mess a disposiziun las candeilas per prender la glisch a casa. Igl ei vegniu fatg stedi diever da quella purschida.

La messa da Nadal per famiglias havein saviu festivar ils 24-12-2021 allas 17.00 grazia agl engaschi da Rilana e Clau cun in chor d'affons ad hoc cun 30 cantaduras e cantadurs dalla scoletta entochen il scalem ault. Il teateret duront messa han ils affons dalla 4. ed entgins dalla 5. classa presentau.

Muort la situaziun da corona han ils retgs cantau uonn sin differents plazs avon scola, baselgia e capluttas. Igl ei stau bi da saver tedlar il cant dils retgs.

Duront ils dis da Pastgas ha il cussegl pastoral usitadamein vendiu las candeilas da Pastgas. Biars ein selegrai dalla biala candeila cun il niev maletg.